

दिनांक 31.12.2024

समय: 18.45 बजे

आकाशवाणी जयपुर—अजमेर
प्रादेशिक समाचार

- प्रदेश मांय औद्योगिक विकास और तेज़ करण सारू नुवा मल्टी मॉडल लॉजिस्टिक पार्क बणावण री कोशिशों सारू।
- लोकसभा अध्यक्ष ओम बिरला समाज रा पूरा विकास सारू सकारात्मक माहौल बणावण माथे ज़ोर दीनो।
- रेलवे रो नुवो टाईम टेबल काल ऊं लागू व्हेला—उत्तर—पश्चिम रेलवे री 66 रेलगाड़ियां माथे असर पड़ेला।
- प्रदेशभर मांय नुवा साल रा स्वागत रो उमाव।
- राज्य मांय केई ठौड़ां घणा कोहरा अर शीत लहर रो कोप—आवता दो—तीन दिन ताई कड़ाका री ठण्ड रा आसार।

000

राज्य सरकार औद्योगिक विकास ने तेज़ करण सारू लॉजिस्टिक्स हब, नुवा औद्योगिक नोड्स अर मल्टी—मॉडल लॉजिस्टिक्स पार्क बणावण माथे ध्यान दे रही है। राइजिंग राजस्थान ग्लोबल इन्वेस्टमेंट समिट पाछे उद्योग विभाग रा प्रमुख शासन सचिव अजिताभ शर्मा अर रीको रा एम.डी. इन्द्रजीत सिंह री अगुवाई मांय एक टीम काम कर रही है। वे परियोजनावां सारू उचित ठौड़ां री पिछाण करण सारू जयपुर कने मांडा, फुलेरा, बिचून अर बागावास गांवां मांय औद्योगिक प्लॉटों रो जायज़ो लीनो।

000

प्रदेश रा 9 जिलां मांय 9 नगरीय निकायां रा रीता ओहदा माथे उप—चुनाव सारू 9 जनवरी 2025 ने वोट पड़ेला। वोट देवण रा दिन सार्वजनिक छुट्टी रो ऐलाण करण रो हक जिला कलेक्टरां ने दियो ज्यो है। ओजू वोट पड़बा रा हालात मांय ई संबंधित जिला कलेक्टर छुट्टी रो ऐलाण कर सकेला। ई बारा मांय सामान्य प्रशासन विभाग हुकम जारी कर दीनो है। बांसवाड़ा, चित्तौड़गढ़, दौसा, हनुमानगढ़, जयपुर, झालावाड़, जोधपुर ग्रामीण, सवाई माधोपुर अर सीकर जिलां रा 9 नगरीय निकायां मांय रीता ओहदा माथे चुनाव कराया जा रहया है।

000

केंद्रीय प्रत्यक्ष कर बोर्ड साल 2024–25 सारू मोड़ा या बदली कर र इन्कम टैक्स रिटर्न दाखिल करण री आखिरी तारीख 31 दिसम्बर ऊं बधा र 15 जनवरी कर दीनी है। इण ऊं रिटर्न दाखिल करण वाळां ने दो सप्ताह रो और बगत मिल जावेला।

000

लोकसभा अध्यक्ष ओम बिरला आज रामगंज मण्डी विधानसभा हलका रो दौरा कीनो। वे गोरधनपुरा मिन्दर मांय दर्शन कीना। ई मौके वे कह्यो के हर एक जणा री बेहतरी ऊं ई समाज आगे बधेला। बिरला कह्यो के ई सारू सकारात्मक माहौल बणावण री ज़रूरत है।

000

प्रदेश मांय राष्ट्रीय युवा पुरस्कार री भांत राजस्थान यूथ आइकन अवार्ड सुरू करी ज्यो है। ई रा तैत न्यारा–न्यारा हलकां मांय बेहतरीन काम करण वाळा नौजवानां रो मान कर्यो जावेला। राजस्थान युवा बोर्ड रा अध्यक्ष डॉ. नीरज के. पवन बतायो के 15 ऊं 29 साल उम्र रा नौजवानां ने ओ ईनाम दे र नवाजा जावेला। अ पुरस्कार राष्ट्रीय युवा दिवस रे मौके 12 जनवरी ने दिया जावेला।

काल ऊं रेलगाड़ियां रो नुवो टाईम टेबल लागू व्हे जावेला। उत्तर पश्चिम रेलवे रा मुख्य जनसम्पर्क अधिकारी कैप्टन शशि किरण बतायो के केई गाड़ियां रा समय मांय बदलाव करी ज्यो है।

000

नुवो साल 2025 अब महज़ कुछ घंटा पछे सुरू व्हेवण वाळो है। आखा प्रदेश मांय नुवा साल री अगवानी सारू तैयारियां करी ज्यी है। पेश है एक रपट—

नुवा साल रो जश्न जैसलमेर रा रेत रा धोरां मांय मनावण सारू ई जणता उमड़ रही है, ज्यां रा सुबीता सारू खास इंतजामात करी ज्या है। म्हाणा खबरनवीस बतायो के जबरदस्त ठारी अर धुंअर रे बावजूद बी.एस.एफ. रा जवान सरहद री हिफाजत रा काम मांय मुस्तैदी ऊं लाग्योड़ा है।

राजसमंद मांय नुवा साल री अगवाणी सारू प्रदेश समेत गुजरात, मध्यप्रदेश अर महाराष्ट्र ऊं मोटी तादाद मांय जातरू श्रीनाथजी मिंदर मांय दर्शन कर

रहया है। चूरु रा सालासर बालाजी मिंदर मांय ई मोटी तादाद मांय जातरु पूग रहया है। राज्यपाल हरिभाऊ बागड़े जनता ने नुवा साल री बधाई अर शुभकामनावां दीनी है। वां रा संदेश मांय बागड़े सगळां री जिन्दगी मांय सुख-समृद्धि अर खुशहाली री कामना कीनी। वे नुवा साल मांय रोजीना कुछ नुवो करण अर समाज सारु योगदान देवण बाबत् ई कह्यो।

000

मुख्यमंत्री भजनलाल शर्मा आज दौसा ज़िला रा मेहंदीपुर बालाजी मिंदर मांय दर्शन कर र देश अर प्रदेश मांय खुशहाली री कामना कीनी। वां सागे गृह राज्य मंत्री जवाहर सिंह बेढ़म, विधायक विक्रम बंसीवाल अर भागचंद टांकड़ा ई मौजूद हा। श्री शर्मा भरतपुर ज़िला रा पूंछरी का लौठा मांय श्रीनाथ जी रा मिंदर मांय दर्शन कीना। वां रो गिरिराज री खास पूजा-अर्चना मांय सिरकत करण रो कार्यक्रम है।

000

जगत् गुरु रामानन्दाचार्य राजस्थान संस्कृत विश्वविद्यालय प्री-पीएचडी परीक्षा री तारीख मांय बदलाव कीनो है। विश्वविद्यालय रा अनुसंधान केन्द्र रा निदेशक डॉ. राजधर मिश्र बतायो के 9 जनवरी ने व्हेवण वाळी आ परीक्षा अब 20 जनवरी ने दो पारियां मांय करायी जावेला।

000

ब्यावर ज़िला मांय ट्रक ड्राइवरां री स्वास्थ्य जांच सारु ज़िला कलेक्टर डॉ. महेन्द्र खड़गावत री पहल परां **मिशन सेफ आई-सेफ हाईवे** चलायी ज्यो है। ई रा तैत ज़िला ऊं निकळबा वाळी ट्रकां रा ड्राइवरां री आंख्या अर स्वास्थ्य री हर टोल नाका माथे मुफ्त जांच करी जावेला अर कमजोर निजर वाळा ड्राइवरां ने चश्मा दिया जावेला।

000

हनुमानगढ़ ज़िला मांय नशा मुक्ति अभियान चलायो जा रह्यो है। जिला कलेक्टर कानाराम नौजवानां ने नशा ऊं दूर करण ने बधावो देवण रा मकसद ऊं सोशल मीडिया इन्फ्ल्यूएंसर सागे मीटिंग कीनी। जिला कलेक्टर सोशल मीडिया इन्फ्ल्यूएंसर ऊं संवेदनशीलता सागे नशा मुक्ति री अपील करण बाबत् कह्यो।

000

सवाईमाधोपुर मांय खुल्योड़ा बोरवेल अर ट्यूबवेल रे कारण व्हेवण वाळा हादसा रोकण सारु आं ने अभियान चला र बंद कराया जावेला। जिला

कलेक्टर शुभम चौधरी अहलकारां ने ई बाबत् हुकम दीना है। वे सगळा एस. डी.ओ., विकास अधिकारियां अर तहसीलदारां ने हिफाजत सागे बोरवेल अर ट्यूबवेल ने ढकबा रा हुकम दीना। ज़िला कलेक्टर किण ई ज़मीं या परिसर मांय बोरवेल खुदावण रा काम री लिखित जाणकारी प्रशासन ने देवणो जरूरी कर दीनो। हनुमानगढ़ रा ज़िला कलेक्टर ई खुल्योड़ा बोरवेल अर साखां री गिरदावरी रा बारा मांय अहलकारा सागे मीटिंग कर विचार कीनो।

000

देश रा उत्तराद हलका ऊं आ रह्या सीळा बायरां ऊं प्रदेश मांय जबरदस्त ठारी पड़ रही है। केई शहरां मांय आज ई घणी धुंअर रही। **करौली**, अजमेर, उदयपुर, बीकानेर, श्रीगंगानगर अर सीकर समेत केई ठौड़ां कड़ाका री ठण्ड रो असर है। मौसम विभाग रे मुजब लारला 24 घंटा मांय प्रदेश मांय सब ऊं कम 4 दशमलव 6 डिग्री सैल्सियस तापमान श्रीगंगानगर मांय दर्ज करी ज्यो। सवाईमाधोपुर मांय 4 दशमलव 8, अजमेर मांय 4 दशमलव 9, बीकानेर मांय 5 दशमलव 2, उदयपुर कने डबोक मांय 5 दशमलव 6, चित्तौड़गढ़ मांय 6 दशमलव 2, चूरू मांय 6 दशमलव 3, सीकर मांय 7, अलवर मांय 7 दशमलव 4 अर राजधानी जयपुर मांय 8 डिग्री सैल्सियस कम ती कम तापमान दर्ज करी ज्यो। हनुमानगढ़ मांय तेज ठण्ड ऊं मौसमी बीमारियां रा मरीजां री तादाद बधबा लागी है। सीएमएचओ डॉ. नवनीत शर्मा जनता ऊं सर्दी ऊं बचाव करण अर सावचेत रहवण री अपील कीनी है। श्रीगंगानगर मांय शीतलहर रे कारण ठिटुरन अर गलन बध ग्यी है। झालावाड़ मांय ई पड़ रही तेज ठण्ड अर कोहरा रे कारण आवण—जावण माथे असर पड़्यो है। मौसम विभाग प्रदेश मांय 3 जनवरी 2025 ताई शीतलहर रो असर रहवण री संभावना जतायी है।

000